

Hset Rôma .

1 .. ¹ Phaulô hapông da Jesus Christ , khoe jah creo broq mangai Tiaq cla , khoe jah lah ðoeq crài hu anoe Bàu lem da Boc Plinh . ² aih Bàu lem enh nèh raq Boc Plinh khoe têu adroe ajang wì pajàu ta hset hadròeh . ³ ràu trùh kon da haq , tiaq xech akia aih hauang loh enh nang noe bùa Đawit . ⁴ tiaq yang da kan hadròeh , taiq haq khoe rih hlài enh kan cachit , aih ma khoe jah nhìn haq joq kon Boc Plinh i cwiang i tai , aih raq Chuaq Jesus Christ , Chuaq da bèn . ⁵ canôm ka haq xam yiniq haq aih , nhên ma khoe jah waq kan tabàih dech , jah broq mangai tiaq cla , ðoeq creo diq ka mangai rìm diac qnoeq trùh ajang kan loq iu da manoh lùì . ⁶ Ta bài mangai aih , oh daq hanoh khoe jah creo enh cla Chuaq Jesus Christ . ⁷ Gòe diq ka mangai Boc Plinh ma loq waq deh oe ta Rôma , jah creo broq mangai hadròeh . Waiq diq ka oh daq jah waq kan tabàih dech , jah kan catêm enh Boc Plinh , aih Baq bèn , xam enh nòe Chuaq Jesus Christ !

Phaulô enh trùh hmàih ta Rôma

⁸ Adroe diq đồng aih , canôm ka Chuaq Jesus Christ , au manè apôi Boc Plinh majah qmang aih manoh lùì da oh daq khoe jah anoe hlài jàp jia ta crông taneh . ⁹ Boc Plinh au ma patih diq dèh ka manoh ti ajang anòe au ma anoe Bàu lem da kon haq , hadai wiang panhìn au ùh lah hêq ka ràu trùh oh daq . ¹⁰ Rìm yàng jò au waiq khàn , au waiq khàn tàng ùh manòeq kô dua hi atiq èh tiaq manoh Boc Plinh , pèh am trong au jah trùh ta oh daq . ¹¹ Joq qmang aih , au toq tangèh jah trùh hmàih ka oh daq , ðoeq hadai jah pajùm kan tabàih yang ti oh daq , ðôq oh daq rai èh rai cajap . ¹² aih iq , au oe qne oh daq , ðoeq hadai bèn wiang parông manoh dabau jah tadêh pajùm ta manoh lùì bèn , aih manoh lùì da oh daq xam da au . ¹³ Au ùh enh ðôq oh daq ùh qnì , bác yàng au khoe padon lam hmàih ka oh daq ðoeq hu jah wiang gít pli ti oh daq xam mangai diac wì mahaq i kan khech tát au trùh manòeq . ¹⁴ Au pòq dòeh mangai Gorec xam mangai ùh xài mangai Gorec , mangai rabiaq xam mangai blùng . ¹⁵ Aih iq dài au majah toq enh anoe Bàu lem am ka pi oh daq , aih mangai ma rih oe ta Rôma . ¹⁶ Joq au ùh camaih ka Bàu lem majah qmang aih , aih raq kan itai da Boc Plinh ðoeq dèch rìm ngai ma i manoh lùì , adroe aih ka mangai Juda atiq aih ka mangai Gorec . ¹⁷ majah qmang aih , enh dalam ka Bàu lem kô khoe mahnu kan taq ataq da Boc Plinh , xi manoh lùì men jah , èh ajèn trùh ta kan lùì hòm , qmang ka bàu ma khoe achih : Mangai taq ataq rih xi manoh lùì” .

Boc Plinh panòeh ka mangai dù ...

¹⁸ Qmang aih , kan nòeh da Boc Plinh khoe mahnu enh plinh tablêq hlài ka rìm trong ùh qnì iu yùq xam kan ùh taq ataq da bài mangai yôc kan ùh taq ataq ðoeq padit trong joq qnàng . ¹⁹ Majah qmang aih , yiniq cleq hu ðôq wì jah loq ka Boc Plinh , diq khoe paqnoh ka wì , Boc Plinh khoe patô ka wì . ²⁰ majah qmang aih kan geo da haq mat bèn ùh xau hnoq , aih la kan itai mòeq ðoe xam manoh haq , enh jò baxèm broq plinh crông taneh khoe dayinh qmòe tiaq ka mat hnoq , jò wì ti ngan yiniq broq da haq . Aih iq dài wì ma pi jah aclai radeh . ²¹ Majah qmang aih yac ka wì loq ka Boc Plinh mahaq wì ùh waq broq qngah yiniq haq aih Boc Plinh , èh hadai ùh waq manè apôi haq , ti tiaq toq trong ùh loh cleq xam manoh blùng binh toq kan clam cluiq . ²² Wì doe ðeh rabiaq , mahaq loh ka ratút . ²³ wì haq khoe halih kan ranhòm ùh lùch da Boc Plinh yôc radua qmù loq hnhung lùch da kon mangai , da chim , da ngè rih tagùng , da ngè loq moq ta taneh . ²⁴ Aih iq , Boc Plinh majah ðôq da wì haq clih deh ta kan amùa qmang ka manoh cla wì haq ma enh , loh qmòe ka broq kan camaih hloe deh ka chac cla , ²⁵ Wì haq halih trong joq qnàng da Boc Plinh , ðoeq yoc kan amòng , kùh waiq rai patih ka bài ngè Boc Plinh ma broq loh , ùh kùh waiq Boc Plinh ma broq loh bài ngè aih , aih Boc Plinh bèn ma khòh manè apôi mòeq ðoe ! Amen . ²⁶ Taiq ajang raq Boc Plinh majah hi ðôq da wì haq tiaq trong tango anang jiang ka camaih , taqne wì haq , gucadrì pi rih hatiaq ma troq trong , wìh tiaq trong ùh troq . ²⁷ Gucalô hadai qmang aih cađac trong gucadrì gucalô , tiaq trong ùh troq aih toq ti enh ka dabau , hadai gucalô aih waq ka dabau , èh cla wì haq hi ep pòq dèh

kan baxa aih .²⁸ Ûh hnau ka aih hòh, pàng wì haq ùh nhet chaq canau ka Boc Plinh , aih iq Boc Plinh majah cadac wì tiaq dèh manoh ùh wìa , òeq broq toq trong ùh loh cleq .²⁹ Wì binh toq kan ùh taq ataq , kan dúc , kan plai , ratauq , toq kan tagit jêh đac mangai , talech , loq qnút , loq nòeh ,³⁰ tapoch dech , tapoch qmèq ka dabau , git ka Boc Plinh , da hadiac , padèch rađeh , catèh , rabiaq trong dù , ùh iu bàu miq baq ,³¹ blùng , ùh qnì wèq dèh bàu , ùh qnì tamèt , ùh i manoh loq waq .³² Yac ka wì loq ka Boc Plinh taq ataq i doe : mangai leq broq bài yiniq qmang aih troq ka cachit , aleq ma xài toq wì haq broq hi hêq , mahaq wì ti baxrùq tam mangai qnoeq broq qmang aih diq.

2

Kan hadrah enh Plinh .

¹ Qmang aih, ih qmat mangai ma toq ti tah hadarah tau , yac ka ih qmat cabô ùh dèh , waq toq ih hi hadrah mangai qnoeq aih èh ih pì jah cwaih rađeh hòh, majah qmang aih jò ih tah hadrah ka wì qnoeq , aih ih hadai tah hadrah ka cla rađeh , ih tah hadrah ka wì mahaq cla ih hadai broq qmang ka wì .² Manòeq kô , bèn loq kan hadrah da Boc Plinh am ka bài mangai broq yiniq qmang aih , aih joq troq tiaq bàu joq qnàng .³ Wùih ! mangai ma toq ti hadrah ka bài mangai broq qmang aih , mahaq cla hadai broq ùh troq , pì loq xoh cla pì claih ka kan hadrah enh Boc Plinh qmòh ?⁴ Ahiaq ih ùh dèh dèm đac kan loq waq binh halùih , kan loq àt , kan ùh manaq da haq , loh ka pì qnì canau kan loq waq da Boc Plinh ma aràng ih trùh ajang kan loq raxach ùh xài ?⁵ Taiq manoh ih cadoq , ùh raxach , aih ih chàu pabinh òeq ka rađeh kan nòeh ta hi mahau atiq kô èh , jò kan hadrah taq ataq da Boc Plinh mahi trùh .⁶ Jò aih , Boc Plinh hi am hlài da tang ngai tiaq tang yiniq wì ma broq .⁷ Mangai leq cajap manoh broq trong lem , chaq kan qngah , kan ranhòm xam kan ùh hiaq loq lùch . Boc Plinh am ka wì kan rih halinh mòeq òeq .⁸ mangai leq i manoh toq àu tablêq , ùh tiaq trong joq qnàng , mahaq iu tiaq kan ùh taq ataq , aih èh Boc plinh patem ka wì kan nòeh xam kan mahau .⁹ kan ùh catèm kan nanxa ka mangai broq dù , adroe aih ka mangai Juda , khoe aih ka mangai Gorec .¹⁰ mahaq kan qngah , kan ranhòm , xam kan catèm am ka rim ngai broq lem , adroe aih ka mangai Juda atiq aih ka mangai Gorec .¹¹ Majah qmang aih , Boc Plinh ùh loq waq ka apah .

¹² Mangai leq broq yiniq lui , yac ka haq ùh qnì ka ranenh haq aih dua hnhung lùch , magai leq loq ka ranenh mahaq broq yiniq lui , aih èh ep òeq da ranenh hadrah haq .¹³ Majah qmang aih ùh xài mangai leq tàng đóc ranenh aih hi wìa mangai taq ataq enh ngèa Boc Plinh , mahaq mangai ma broq tiaq ranenh aih majah broq mangai taq ataq.¹⁴ Ma joq qnàng , mangai diac wì ùh i deh ka ranenh Môise , jò wì haq broq deh trong ranenh ma thê , bài mangai aih yac ka ùh i ka ranenh , dua khoe broq ka rađeh i ranenh .¹⁵ Wì haq patô qnoh trong ranenh ma thê aih khoe achih deh ta manoh cliac wì haq: Manoh da cla panhin am ka ranenh , gàu ngoc da cla i jò bahmàng i jò palem deh cla.¹⁶ Aih la bài yiniq padon trùh ta hi da Boc Plinh enh dalam ka Chuaq Jesus Christ hu hadrah kan hlêp ta manoh kon mangai, wop qmang ka Bàu lem au ma khoe anoe .

¹⁷ Manòeq , ih doe rađeh kô mangai Juda , kùì padài enh qnhèq ka ranenh, catèh deh loq ka Boc Plinh ,¹⁸ loq ka manoh haq , canau trong leq troq , trong leq ùh , majah qmang aih ranenh khoe hnài ih .¹⁹ catèh deh broq mangai ajèn trong ka mangai lua mat , broq kan qngah ka mangai oe ta clam ,²⁰ broq mangai hnài bài mangai blùng , bài mangai qnhòq gèh manoh, majah qmang aih ta hset ranenh i kan rabiaq xam trong joq qnàng .²¹ qmang aih ih hnài mangai qnoeq mahaq ùh hnài cla rađeh qmoh ? ih hnài apaq atùng , mahaq ih atùng !²² Ìh doe : ùh khòh tango , mahaq ih tango ! Ìh git ramòt ka bài radua qmù , mahaq ih blah yóc da haq dahwèq .²³ Ìh hnhè rađeh wèq tiaq ranenh , mahaq ih ùh broq tiaq ranenh , dài aih raq ih ma khoe broq kan xep ka Boc Plinh!²⁴ Taiq pì raq , wì mangai enh gùng majah tapoch qmèq ka yiniq Boc plinh , tiaq qmang ka bàu ma khoe achih.²⁵ Joq !

tàng pi broq tiaq ranenh , ramènh kat akia aih ùh hiaq ngwan , mahaq tàng pi broq ùh troq tiaq ranenh , yac ka pi broq ramènh kat akia aih bu diang ùh. ²⁶ Qmang aih , tàng mangai qnhòq broq ramènh kat akia wèq tiaq bàu ranenh hnài , aih ma ùh tiah ka khoe kat akia qmòh ? ²⁷ Mangai ùh broq ramènh kat akia , mahaq wèq gèh geo tiaq bàu ranenh , mangai aih èh ma hadrah bài pi , aih bài mangai yac ka i ranenh , i broq ramènh kat akia , mahaq ùh lènh broq tiaq ranenh . ²⁸ Qmang aih mangai leq toq enh gùng haq broq mangai Juda , aih ùh xài mangai Juda , ramènh kat akia toq enh gùng , aih ùh xài ra mèn kat akia . ²⁹ mahaq mangai Juda ma joq qnàng aih mangai Juda enh dalam , ramènh kat akia ma joq qnàng aih ramènh kat akia enh dalam xi Yiang hadròeh , ùh xài tiaq toq bàu achih . Mangai Juda qmang aih ma taji ka manè , khôh jah padèch , ùh xài enh kon mangai mahaq enh Boc Plinh .

3.....

Boc Plinh hadrah taq ataq .

¹ Tàng qmang aih kan yeo loe da mangai Juda aih qmang leq , ùh meh ramènh kat akia ajah cleq? ² Jah bàc trong . Adroe aih rameh : Aih xài bàu Boc Plinh khoe am ka mangai Juda. ³ Mahaq tàng ta wì aih i bìa ngay loq tablòq manoh ka Boc Plinh , kan loq blòq manoh da wì haq ahiaq broq ka kan ùh tablòq mannoh cliac da Boc Plinh loh qngwan qngwaiq ùh? . ⁴ Ùh i qmang aih ! Boc Plinh aih joq qnàng, kon mangai kô ma loq qnùt , tiah ka khoe achih

“ Wì jah creò ka ih mangai taq ataq , jò ih capoch

Jah blèq jò wì tah hadarah ka ih”.

⁵ Mahaq tàng kan ùh taq ataq da bèn jah patô qnoh kan taq ataq da Boc Plinh , aih èh bèn anoe qmang leq? , Boc Plinh ma ùh taq ataq jò haq qnoh kan panòeh ka bèn qmòh?(Au capoch troeq wì ma dih loq rahen) ⁶ Joq ùh lòm, tàng qmang aih èh Boc Plinh hadrah cròng tneh kô qmang leq ? ⁷ Mahaq tàng bàu joq qnàng da Boc Plinh jah kan ranhòm haqnèq ajang nòe bàu tapoch qnùt da au, aih hagleq au majah oe ep pòq kan hadrah tiah ka mangai broq yiniq lui?. ⁸ Tàng qmang aih hagleq bèn ùh broq trong dù òeq jah trong lem , tiah ka mangai loq patah khoe capoch dech ka nhèn doe nhèn hnài trong aih? Kan hadrah baxa taqmòq ka wì haq aih taq ataq ,

Ùh i mangai leq ma taq ataq

⁹ Aih qmang leq , bèn i cleq ma yeo lem ka wì ? Ùh lòm i , hacô bèn khoe anoe panhin yac ka mangai Juda yac mangai Gorec diq oe enh qneq ka cwiang yiniq lui . ¹⁰ qmang ka khoe achih :

“Ùh i cabô taq ataq ,yac ka mòeq ngay dua ùh ,

¹¹ Ùh i cabô i mamoh loq hèm,

Ùh i cabô ti chaq Boc Plinh .

¹² Wì haq diq khoe lam hwang , diq khoe pi loh cleq,

Ùh i mòeq ngay broq trong lem , yac ka mòeq ngay dua ùh.

¹³ Hông wì haq da hah tiah ka ngah ralùng hanang .

Yôc dèh rapet òeq qnùt wì qnoeq .

Blia hacùng wì haq i nóc bìh tùa .

¹⁴ Hacùng wì haq toq nà hanip xam kan pagau ,

¹⁵ Jènh wì haq darènh toq ka broq ta ùc mahim ,

¹⁶ Trong lam da wì haq toq kan raliang xam nanxa ,

¹⁷ Wì ùh lah qnì ka trong ma catèm ,

¹⁸ Enh ngèa wì haq ùh i kan loq iu yùq Boc Plinh .

¹⁹ Manòeq kô bèn loq, rìm yiniq ranenh ma anoe , aih anoe ka rìm ngai oe enh qneq ka ranenh , dôq rìm toq hacùng diq ep caqnhip , diq ka phù cròng ep pòq yiniq lui enh ngèa Boc Plinh , ²⁰ majah qmang aih ùh i ka cabô broq tiaq ranenh ma jah creô ka haq aih taq atoq enh ngèa Boc Plinh, majah qmang aih ranenh patô dôq wì loq dèh ka yiniq lui .

I manoh lùl men jah kan taq atoq ...

²¹ Mahaq manòeq kô , kan taq atoq enh Boc Plinh , Hset ranenh xam bài pajàu ma khoe wiang panhìn , khoe patô qnoh enh gùng ka ranenh . ²² Aih la kan taq atoq da Boc Plinh oe ajang nôe bèn lùl Chuaq Jesus Christ , am diq ka rìm ngai ma lùl . Ùh i cleq crài ka dabau . ²³ majah qmang aih rìm ngai diq khoe broq yiniq lui , khoe capòch ka kan ranhòm da Boc Plinh . ²⁴ mahaq canòm kan tabàih enh Boc Plinh , wì jah dech kan taq atoq , majah qmang aih kan baxon hlài khoe jah broq gèh enh dalatm ka Chuaq Jesus Christ , ²⁵ aih la Mangai Boc Plinh khoe dèch haq broq ramènh baxon hlài , xi manoh lùl ta mahim haq aih , Boc Plinh rangep ka kan panòeh , ajang aih haq paqnòh dèh kan taq atoq . Majah qmang aih , haq khoe caqnaih da wì yiniq lui ma broq enh nèh. ²⁶ Haq khoe broq qmang aih dòeq taqnòh kô haq patô dèh kô taq atoq dòeq creô ka mangai leq ma lùl Chuaq Jesus jah kan taq atoq ²⁷ Qmang aih , kan catèh oe jang leq ? Pi i , khoe cadac , cadac ajang ranenh leq ? Tiaq ranenh da yiniq broq ? Ùh xài , mahaq tiaq ranenh da manoh lùl . ²⁸ Majah qmang aih bèn doe kon mangai jah kan taq toq ajang nôe manoh lùl , ùh xài ajang broq tiaq ranenh . ²⁹ Ahiaq Boc Plinh aih Boc Plinh toq da mangai Juda ? Ma ùh xài hadai Boc Plinh da mangai diac wì diq ? ³⁰ majah qmang aih i mòeq Boc Plinh raq , aih Yiang broq ka mangai kat akia jah taq atoq tiaq manoh lùl , hanoh broq ka mangai ùh kat akia jah kan taq atoq tiaq manoh lùl .

³¹ Tàng qmang aih , canòm ka manoh lùl bèn ka cadac ranenh qmòh? Joq ùh lòm i qmang aih . Yeo hnau ka aih bèn broq ka ranenh jah cajap .

4

Apraham jah taq atoq xi manoh lùl ...

¹ Qmang aih bèn anoe qmang leq Apraham cadraq bèn . tiaq xech akia haq khoe jah lòeq cleq? ² Joq qmang aih , tàng joq haq khoe jah kan taq atoq tiaq yiniq broq , aih i nôe dòeq haq jah padèch raðeh , mahaq enh ngèa ka Boc Plinh ùh xài qmang aih . ³ Majah qmang aih, Hset Hadròeh hnài cleq? Apraham lùl Boc Plinh , biac aih raq khoe broq ka haq jah kan taq atoq !. ⁴ Manòeq kô mangai abroq , hliac jènh baha aih ùh xài kan tabàih , mahaq tiaq ka dòeh , ⁵ mangai ma ùh dùh i broq qmòe cleq , mahaq lùl Boc Plinh aih Yiang broq ka mangai pòq yiniq lui jah kan taq atoq , manoh lùl da haq aih majah creô ka haq aih taq atoq . ⁶ Dawit hanoh anoe qmang aih , jò haq ràu trùh xôq ramot ka mangai jah Boc Plinh am ka haq kan taq atoq ùh tiaq trong yiniq abroq , rameh :

⁷ “ Joq xôq ramot qnâng ka bài mangai lui haq jah caqnaih ,

Yiniq lui haq jah gahnâp!

⁸ Joq xôq ramot qnâng ka mangai Boc Plinh pi arên da haq yiniq lui” .

⁹ Bâu anoe trùh xôq ramot aih , ma anoe toq ka mangai ma kat akia qmòh ? Hadai am ka mangai ma ùh kat akia . Majah qmang aih bèn doe ameh : Manoh lùl da Apraham khoe jah tinh ka haq taq atoq . ¹⁰ Mahaq jah tinh qmang leq ? Atiq ka haq broq ramênh kat akia loq adore ka haq broq ramênh kat akia ? Aih ùh xài atiq ka haq broq ramênh kat akia , mahaq adroe . ¹¹ Qmang aih ,haq khoe jah yôc teo xit kat akia , tiaq ka teo da kan taq atoq haq ma khoe jah dèh adroe xi manoh lùl , jò haq qnhòq broq ramênh kat akia , òeq hu broq baq diq dõng bài mangai lùl mahaq ùh broq ramênh kat akia , dõq wì aih hadai jah kan taq atoq . ¹² òh hadai broq baq bài mangai broq ramênh kat akia , aih baq da bài mangai ùh xài toq kat akia hi hêq , mahaq hadai cadiang tiaq teo manoh lùl manoh lùl da Apraham kan cadraq bèn , ma khoe jah dèh adroe ka haq broq ramênh kat akia . ¹³ Qmang aih ,bâu ma têu am ka Apraham xam nang noe haq jah yôc diq crõng taneh kô broq kùng hang ,ùh xài loh enh ranenh , mahaq loh enh kan taq atoq da manoh lùl . ¹⁴ Majah qmang aih , tàng tiaq ranenh men jah kùng hang , aih òh manoh lùl hi loh ka qngwan qngwaiq , bâu têu am hadai khoe cadac . ¹⁵ majah qmang aih , ranenh plõh loh toq kan panòeh , mahaq taleq ùh hiaq i ranenh , ta aih hadai ùh i mangai broq ùh troq ka ranenh .

¹⁶ Qmang aih , canòm ka manoh lùl kon mangai ma hi jah waq kùng hang , bài yiniq aih diq jah xi kan tabàih dech , òeq bâu têu jah cajap ka nang noe Apraham , ùh xài am toq ka nang noe oe enh qneq ka cwiang da ranenh , mahaq hadai am ka nang noe i manoh lùl da Apraham , kan cadraq bèn , ¹⁷ wop qmang ka bâu ma khoe achih : Au khoe dèch ìh broq baq bác diac . Haq aih joq baq da bèn oe enh ngèa ka Boc Plinh, aih Mangai haq ma khoe lùl , aih Boc Plinh ma am kan rih ka mangai cachit , creo ka bài yiniq qnhòq i tiaq gleq khoe i . ¹⁸ Haq taqngèh gòm jò pi qmòe ka dua hu gòm tangèh , mahaq dua haq lùl, aih haq ma hijah wia baq bác diac , tiaq qmang ka bâu khoe doe ka haq : “ Nang noe ìh jah qmang aih òh” . ¹⁹ Haq hnoq dèh chac khoe craq , majah qmang aih khoe ten hrinh hanam , hnoq Sara pi oe jah ha-uang , mahaq manoh lùl da haq dua ùh xùch . ²⁰ Haq ùh lòm rangòt , hadai ùh hiaq ùh tin bâu Boc Plinh , mahaq kan lùl haq òh rai dèh rai toq manè apôi Boc Plinh. ²¹ majah qmang aih haq lùl trong leq Boc Plinh khoe têu , Boc Plinh i cwiang òeq broq gèh trong aih . ²² Aih iq ,dài manoh lùl da haq khoe broq ka haq jah kan taq atoq . ²³ Bâu ma doe : “ Manoh lùl da haq khoe broq ka haq jah kan taq atoq” , aih ùh xài anoe toq ka mòeq ngai cla haq , ²⁴ mahaq hadai anoe am ka bèn , manoh lùl hadai broq ka bèn jah kan taq atoq, majah qmang aih bèn lùl Boc Plinh aih Mangai khoe broq ka Chuaq Jesus , Chuaq da bèn rih hlài enh kan cachit , ²⁵ Taiq yiniq lui bèn wì rùp jêh đac haq, haq rih hlài òeq broq ka bèn jah kan taq atoq .

5

Kan catêm xam kan tangèh

¹ Qmang aih patep pang jò khoe jah creo ka bèn mangai taq atoq tiaq manoh lùl , aih bèn khoe jah hatroq ti Boc Plinh , canòm ka Chuaq Jesus Christ da bèn . ² aih Mangai broq ka bèn jah mùt ta kan tabàih dech kô , aih raq kan tabàih ma broq ka bèn jah yòng cajap manòeq, òh bèn hadai catèh radeh ajang nòe tangèh gòm kan ranhòm da Boc Plinh . ³ Ma xài toq aih hi diq, bèn hadai catèh radeh ta kan nanxa diq, majah qmang aih bèn loq kan nanxa men loh kan loq kêm , ⁴ kan loq kêm men loh kan qnhrang, kan qnhrang men loh kan tangèh . ⁵ Kan tangèh ùh broq ka bèn ep camaih xep , majah qmang aih kan loq waq da Boc Plinh khoe púc jàp ta manoh bèn xi Yiang Hadròeh ma khoe am ka bèn. ⁶ Joq qmang aih, jò bèn oe raq ùh nac canèn ,tiaq troq dèh jò ma pajaq

adroe, Christ khoe cachit am ka mangai i yiniq lui . ⁷ Biaq ka i mangai chiuq cachit am ka mangai taq ataq , dùnh dùnh ji loq i mangai cachit am ka mangai lem. ⁸ Mahaq Boc Plinh mahno kan loq waq haq am ka bèn , jò bèn oe raq mangai i yiniq lui , aih Christ khoe cachit am ka bèn. ⁹ manòeq kô bèn khoe canòm ka mahim haq òeq jah kan taq ataq , aih èh hadai canòm ka haq raq òeq hu jah dèch claih khoe ka kan mahau kân enh Boc Plinh dàng leq hòmm ! ¹⁰ Majah qmang aih jò bèn oe raq tablêq ka Boc Plinh , mahaq khoe jah hatroq hlài ka haq canòm ajang nòe kon haq khoe cachit am ka bèn, loq ka manòeq kô jò khoe jah hatroq , bèn jah canòm kan rih da Kon aih raq òeq bèn jah dèch dàng leq hòmm! ¹¹ ùh xài toq aih hi diq , mahaq enh dalam ka Chuaq Jesus Christ bèn jah catèh raðeh ta Boc Plinh, canòm ka haq aih bèn khoe jah hatroq ka Boc Plinh.

Cachit oe enh dalam ka Adam , rih hlài oe enh dalam ka Jesus Christ....

¹² Qmang aih , taiq mòeq ngai raq yiniq lui ma khoe mùt ta crông taneh kô , taiq yiniq lui majah i kan cachit , hadai qmang aih kan cachit khoe trùh ta rìm ngai ,majah qmang aih taiq rìm ngai diq khoe i yiniq lui . ¹³ Majah qmang aih , adroe ka i ranenh , yiniq lui khoe i ta crông taneh kô, mahaq qnhòq i ranenh , dài aih yiniq lui hadai qnhòq taqmòq ka cabô .¹⁴ Hnoq anoe qmang aih , patep enh Adam trùh ta Môise, rìm ngai diq khoe oe enh qneq ka cwiang da kan cachit , hloe xam mangai ùh broq òeq yiniq lui tiah ka yiniq lui da Adam, aih mangai ma broq dua òeq ka Mangai hu padon trùh . ¹⁵ Mahaq yiniq lui crài ka kan tabàih dech . Majah qmang aih , tàng joq taiq mòeq ngai raq ma broq yiniq lui mahaq mangai qnoeq ep cachit ataq , loq ka kan loq waq da Boc Plinh xam kan am dech da haq canòm ajang mòeq ngai Chuaq Jesus khoe ùc bình halùih ka rìm ngai! ¹⁶ Èh hòmm, kan am dech kô haq crài ka biac loh enh mòeq ngai ma broq yiniq lui: Mòeq yiniq lui raq, mahaq kan hadrah khoe taqmòq kan cachit , mahaq da kan am dech aih : atiq ka jò yiniq lui khoe bàc aih cadoe aràng am ka bèn kan taq ataq. ¹⁷ Majah qmang aih ,tàng joq taiq yiniq lui da mòeq ngai raq kan cachit khoe jah wèq cwiang enh mangai aih , loq ka bài mangai jah ùh diq ùh dài kan tabàih enh Boc Plinh xam kan am dech da kan taq ataq , wì haq jah canòm ka mòeq ngai Chuaq Jesus Christ òeq jah cwiang ta kan rih yeo hnau ka aih hòmm! ¹⁸ Qmang aih , taiq mòeq yiniq lui raq kan hadrah baxa khoe taqmòq ka rìm ngai qmang leq , hadai qmang aih mòeq ngai raq broq taq ataq ,kan taq ataq aih am kan rih hadai jàp ka rìm ngai . ¹⁹ Majah qmang aih ,taiq kan ùh iu da mòeq raq ,dài mangai qnoeq diq loh òeq mangai i tuiq, hadai qmang aih diq , taiq kan loq iu da mòeq ngai raq dài mangai qnoeq diq loh òeq mangai taq ataq . ²⁰ Ranenh khoe plah raðeh taqne , òeq yiniq lui èh rai bàc , mahaq taleq yiniq lui khoe rai bàc, ta aih kan tabàih dech bàc yeo hnau hòmm , ²¹ Qmang aih ,yiniq lui wèq cwiang ta kan cahit qmang leq , kan tabàih dech wèq cwiang ta kan taq ataq hanoh qmang aih òeq hu am kan rih halinh mòeq òeq enh dalam ka Jesus Christ aih Chuaq bèn .

6...

Cachit ka yiniq lui...Rih hlài enh dalam Jessus Christ

¹ Qmang aih bèn oe anoe qmang leq hòmm ? Ajoq bèn oe catàm yôt ta yiniq lui òeq kan tabàih dech jah ùh diq ùh dài qmòh? ² ùh lòm qmang aih, bèn khoe cachit ka yiniq lui , ji lai q bèn ma oe rih ta yiniq lui hòmm ? ³ Ahiaq oh daq ùh qnì ,diq òeq ka bèn khoe jah baptem enh dalam ka Chuaq Jesus Christ , aih baptem enh dalam kan cachit da haq qmòh ? ⁴ Bèn khoe jah catùh ti haq xi baptem enh dalam kan cachit haq, òeq tiah ka Chuaq Jesus Christ canòm kan ranhòmm enh nòe Baq jah rih hlài enh kan cachit qmang leq ,bèn hadai jah rih hlài ta kan rih maneo qmang aih . ⁵ Tàng joq bèn khoe pajùm mòeq ti haq ta kan cachit qmang ka haq , aih èh joq qnàng bèn hadai jah pajùm mòeq ti haq ta kan rih hlài tiah qmang ka haq. ⁶ majah qmang aih bèn loq kon mangai dùnh da bèn khoe jah tiàng talong pagat ti haq, òeq chac ma patih ka yiniq lui kô jah lùch òeq òeq , aih èh bèn pi ep broq hapõng ka yiniq lui hòmm.⁷ Majah qmang aih , mangai leq khoe cachit haq aih khoe jah claih ka yiniq lui . ⁸ Manòeq kô, tàng joq bèn khoe cachit ti Christ , bèn loq aih èh raðeh hadai jah rih hlài ti haq . ⁹ Majah qmang aih

bèn loq , pang jò Chuaq Jesus Christ khoe rih hlài enh kan cachit ,haq pi cachit hòh , kan cachit pi i cwiang cleq enh qnhèq ka haq hòh . ¹⁰ Haq cachit aih cachit ka yiniq lui , cachit mòeq yàng am ka diq dõng , mahaq manòeq kô haq rih aih rih ka Boc Plinh. ¹¹ Hadai qmang aih diq , oh daq drah ngan rađeh hadai khoe cachit ka yiniq lui mahaq rih ka Boc Plinh enh dalam ka Chuaq Jesus Christ . ¹² Apağ dõq yiniq lui oe i cwiang cleq ta chac hamac ma loq cachit da oh daq , apağ tiaq trong haq ma ònh . ¹³ Apağ dèch chac hamac cla am ka yiniq lui, òeq broq ranac patih ka kan dù , mahaq drah dèch chac cla oh daq ka Boc Plinh qmang ka mangai khoe cachit mahaq manòeq kô khoe rih hlài, dèch rim yiniq ta chac cla am ka Boc Plinh òeq broq ranac patih am ka kan taq atòq . ¹⁴ Majah qmang aih yiniq lui ùh i cwiang cleq ta oh daq, taiq oh daq pi i oe enh qneq ka ranenh mahaq oe enh qneq kan tabàih dech. ¹⁵ Khoe aih qmang leq !Taiq bèn pi oe enh qneq ka ranenh , mahaq oe enh qneq ka kan tabàih dech aih èh bèn khòh broq yiniq lui qmòh? Ùh qmang aih ! ¹⁶ Oh daq ma ùh loq ! tàng joq oh daq khoe dèch cla rađeh òeq hu iu tiaq cabò , aih axài broq dic mangai bèn ma iu , broq dic da yiniq lui ajèn trùh ta kan cachit loq broq dic da kan loq iu òeq hujah kan taq atòq ? ¹⁷ Mahaq manè apôi Boc Plinh, majah qmang aih atiq ka oh daq broq dic ka yiniq lui, mahaq manòeq kô khoe diq ka manoh wih hlài iu tiaq Trong ma khoe hnài òeq broq maneh ka rađeh ! ¹⁸ Qmang aih oh daq khoe claih enh yiniq lui, khoe jah wia hapõng kan taq atòq . ¹⁹ Au anoe troeq bàu wì maloq doe ,majah qmang aih kon mangai da oh daq ùh i nèn cleq .Qmang aih oh daq khoe hmaq òeq dèh chac hamac broq hapõng dic kan amua ratauq broq dù qmang leq , manòeq kô oh daq hadai dèch dèh chac broq hapõng kan taq atòq qmang aih diq . ²⁰ Jò oh daq oe raq broq dic ka yiniq lui, oh daq ùh i tawac cleq ka trong taq atòq . ²¹ Aih oh daq jah cleq ? Ajoq manòeq kô oh daq jah toq kan camaih, majah qmang aih pulùch da bài yiniq aih xài kan cachit. ²² Mahaq manòeq kô oh daq khoe jah claih enh yiniq lui khoe jah wia hapõng Boc plinh , aih oh daq jah yóc ka rađeh kan hadròeh òeq pulùch èh jah kan rih halinh mòeq òeq. ²³ Majah qmang kan baha da yiniq lui aih kan cachit , mahaq kan am dech enh Boc Plinh aih kan rih halinh enh dalam ka Chuaq Jesus Christ , Chuaq da bèn.

7 . *Jah claih ka long ech Ranenh*

¹ Oh daq ma ùh loq (Au doe ka mangai ma loq ka ranenh) ranenh i cwiang toq jò mangai oe rih qmòh? ² Tiah ka gucadri i òng , waq toq òng haq oe rih pang leq , ranenh panan haq tiaq deh òng pang aih , mahaq tàng òng haq cachit haq jah claih enh ranenh ma khoe kàt haq ti òng . ³ Qmang aih, tàng joq òng haq oe rih , mai haq lam yóc mangai qnoeq ,aih ep creò ka haq mangai gucadri tango, mahaq tàng joq òng haq khoe cachit ,aih haq khoe claih ka ranenh , yac ka haq yóc mangai qnoeq , haq ùh xài mangai tango . ⁴ Yòiq oh daq da au ! oh daq hanoh qmang aih, xam chac da Christ oh daq hadai khoe cachit ka ranenh ,òeq hu jah yóc mangai qnoeq , aih mangai ma khoe rih hlài enh kan cachit , dõq bèn jah loh pli ka Boc Plinh. ⁵ Majah qmang aih jò bèn oe rih tiaq kan loq ònh da xech akia nèh , ranenh khoe parèu bài kan qmèq tabroq ta chac bèn dõq loh pli ta kan cachit. ⁶ Mahaq manòeq kô tiaq ranenh ma xan rùp padràng yót bèn , bèn khoe cachit, bèn khoe jah claih khoe ka ranenh ,òeq hu patih ka Boc Plinh tiaq trong neo da Yiang Hadròeh ,pi oe tiaq trong dùnh da bàu achih .

Ranenh patô qnoh yiniq lui...

⁷ Qmang aih bèn oe anoe cleq hòh? Ranenh aih iq yiniq lui qmòh? Joq ùh lòm i qmang aih! Mahaq taiq ranenh au men jah loq dèh ka yiniq lui, tàng joq ranenh ùh doe “Ìh ùh khòh daiq ”, aih au khoe ùh qni ka kan daiq . ⁸ Aih iq, yiniq lui khoe dahòiq ajang ranenh òeq xèh qnoh bài kan loq ònh daiq ta cliac au : Ùh hiaq i ranenh , aih yiniq lui cachit . ⁹ Nèh haq, qnhòq i ranenh aih au rih , yàng jò ranenh hi trùh aih yiniq lui rih , au loh ka cachit glòq hòh ¹⁰ Au ma hi hnoq, lèh gèh haq ranenh òeq broq ka au rih, cadoe tic aràng au trùh ta kan cachit . ¹¹ Majah qmang aih yiniq lui khoe dahòn yóc ranenh òeq hu padô au , ti ajang aih raq au majah cachit . ¹² Qmang aih, ranenh aih hadròeh ,bàu thè hanoh hadròeh , diq lem rai taq atòq . ¹³ Wùih kan lem qmang aih khoe

loh nen dôq au cachit qmôh ? Ûh lôm i qmang aih ! Mahaq yiniq lui ma khoe broq ka au cachit , haq yôc kan lem broq au cachit, ðeq haq jah patô radeh aih yiniq lui, aih iq yiniq lui cachat ajang ranenh majah loh ka xôc diq jaq.

Ranenh xam yiniq lui tablêq ka dabau enh dalam chac mangai .

¹⁴ Bèn loq ranenh aih yang , mahaq manoh da au kô aih xech akia , khoe tech ðeq broq dic ka yiniq lui . ¹⁵ Majah qmang aih, au ùh qnì ðeh broq cleq : Au ùh lôm broq trong cla ma enh, mahaq broq toq trong cla ma git ¹⁶ Mahaq tàng au broq trong au ma git , aih au canau loq ranenh joq qnàng lem. ¹⁷ Jô aih au mahi loq ,ùh xài au broq bài yiniq aih , mahaq yiniq lui rih oe enh dalam ka au . ¹⁸ Au loq kan lem ùh oe ta au , aih iq rameh : haq ùh oe ta manoh au , majah qmang aih au enh broq trong lem mahaq ùh hlât broq ka gêh.¹⁹ Au ùh broq trong lem au ma enh , mahaq broq trong qmêq cla ma ùh enh . ²⁰ Manòeq kô tàng joq au broq trong au ùh enh , aih pi xài au broq mahaq yiniq lui ma rih oe enh dalam ka au ma broq trong aih .²¹ Qmang aih au hnoq i ranenh kô enh dalam ka au :Jô au enh broq trong lem ,kan qmêq hatiaq hloe au jô aih raq ²² Majah qmang aih tiaq kon mangai enh dalam, au lem bùi ka ranenh Boc Plinh .²³ mahaq au loq ðeh ta chac i mòeq ranenh qnoeq tablêq ka ranenh ta gàu au , panan thê au broq hapông ranenh da yiniq lui , aih ranenh ma qnang tabroq ta chac au . ²⁴ Joq habo ka au! Cabô mahu ðech au claih khoe ka chac hamac loq cachit kô êh? ²⁵ Manè apôi Boc Plinh , canôm ka Chuaq Jesus Christ ,aih Chuaq da bèn! Qmang aih , cla au yôc ðeh gàu ngoc patih ka ranenh da Boc Plinh , mahaq xech akia au broq hapông dic ka ranenh da yiniq lui.

8.....

Rih enh dalam kaYiang Hadròeh ..

¹ Qmang aih ,manòeq kô khoe pi i kan hadrah ka mangai oe ta Chuaq Jesus Christ ² Majah qmang aih ranenh da Yiang Hadròeh kan rih khoe canôm ka Chuaq Jesus Christ ðeq caqnaih au loh khoe ka ranenh da yiniq lui xam kan cachit. ³ Majah qmang aih yiniq cleq ranenh ma ùh hlât broq , taiq xech akia broq ka ranenh loh ka pi nèn , aih Boc Plinh khoe broq : Taiq yiniq lui haq majah khoe thê ðeh kon yôc xech akia qmang ka xech akia yiniq lui da bèn ,êh khoe hadrah yiniq lui ta xech akia aih, ⁴ dôq kan taq atoq da ranenh ma panan broq jah gêh enh dalam bèn , aih la bài mangai ma ùh tiaq dua da xech akia mahaq tiaq dua da Yiang Hadròeh. ⁵ Mangai rih tiaq xech akia gàu ngoc wì haq haqmiang chaq toq trong xech akia ma enh , mangai rih tiaq Yiang Hadròeh manoh haq haqmiang chaq toq trong daYiang Hadròeh , ⁶ Chaq toq trong da xech akia enh aih êh loh kan cachit , chaq trong Yiang Ha droèh aih êh loh kan rih xam kan catêm . ⁷ majah qmang aih haqmiang chaq toq trong da xech akia aih tablêq hlâi ka Boc Plinh, majah qmang aih haq ùh tiaq ranenh da Boc Plinh ,yeo hnau ka aih hòm haq tiaq ùh jah . ⁸ Bài mangai rih tiaq xech akia ,ùh jô leq lem ka manoh Boc Plinh . ⁹ Hnoq anoe qmang aih, tàng joq Yiang Hadròeh da Boc Plinh rih oe enh dalam oh daq , oh daq ùh rih tiaq xech akia hòm mahaq rih tiaq Yiang Hadròeh , tàng cabô ùh i ka Yiang Hadròeh da Christ , aih ùh xài mangai da haq . ¹⁰ Qmang aih , tàng joq Christ oe enh dalam oh daq , yac ka chac oh daq cachit ka yiniq lui, mahaq yang aih rih taiq kan taq atoq .¹¹ Êh hòm , tàng joq Yiang da Boc Plinh ma khoe broq ka Chuaq Jesus rih hlâi enh kan cachit oe ti oh daq . Haq ma broq ka Chuaq Jesus rih hlâi enh kan cachit aih hadai canôm ka Yiang da haq ma oe ta dalam oh daq ðeq broq ka chac mac ma loq cachit da oh daq jah rih hlâi ¹² Qmang aih, diq ka oh daq bèn pi oe pòq ðoèh xech akia ðeq hu rih tiaq haq . ¹³ Joq qmang aih , tàng joq oh daq rih tiaq xech akia , aih êh ep cachit , mahaq tàng canôm ka Yiang Hadròeh ðeq haq broq cachit ðong bài kan qmêq da chac hamac aih êh oh daq rih . ¹⁴ Majah qmang aih , diq ðong mangai leq i Yiang Hadròeh da Boc Plinh qnung trong ,aih diq kon Boc Plinh . ¹⁵ Yiang Hadròeh oh daq ma khoe jah aih ùh dôq oh daq broq hapông dic ðeq rih ta kan yùq crê hòm , mahaq khoe am ka oh daq jah

i manoh da kon ban , canòm ajang aih bèn mahi jah creo “Aba- Baq!” .¹⁶ Yiang Hadròeh raq ma khoe panhin ta manoh bèn loq deh kô kon Boc Plinh .¹⁷ Manoèq kô, tàng joq bèn kon Boc Plinh, aih bèn hadai mangai wiang jah kùng hang . Mangai wiang jah kùng hang enh Boc Plinh ,mangai wiang jah kùng hang ti Christ, waq toq bèn hadai wiang nanxa ti haq ,aih èh bèn hadai wiang jah kan ranhòm ti haq.

Kan ranhòm tangèa èh.....

¹⁸ Au hèm ,kan nanxa manòeq kô ùh tajì òòeq hu tawèh ti kan ranhòm padon trùh ta bla èh , aih la bài kan ranhòm hu padon qnoh am ka bèn. ¹⁹ Joq qnàng qmang aih , rìm yiniq diq toq tangèh gòm hnoq bài kon Boc Plinh jah paqnoh . ²⁰ Majah qmang aih, rìm yiniq Boc Plinh broq loh diq khoe oe enh qneq ka kan cachit lùch , ùh xài cla enh qmang aih mahaq enh Mangai ma broq loh bài yiniq aih . ²¹ Rìm yiniq khoe jah broq loh aih hadai tangèh ka raðeh jah dèch claih khoe ka kan cachit lùch , òòeq hu hanoh jah oe ta kan ranhòm ti kon Boc Plinh . ²² Bèn loq rìm yiniq hadai toq hràng xalep trùh manòeq , ²³ ùh xài toq bài ngè khoe jah broq loh aih ,mahaq xam bài bèn aih bài mangai ma i pli ramua da Yiang Hadròeh , hadai hràng ta manoh cliac , jò bèn qnang gòm òòeq hu jah broq kon ban , aih la kan baxon hlài chac hamac bèn .²⁴ Ta kan tangèh gòm kô raq bèn ma khoe jah dèch , jò wì khoe jah trong raðeh ma tangèh gòm, aih ma oe tangèh cleq hòh , bèn khoe jah hnoq aih oe tangèh gòm dèh hòh ?²⁵ Mahaq tàng bèn tangèh yiniq deh qnhòq hnoq , aih ajoq bèn gòm qmòe rai àt ,²⁶ Hadai qmang aih , Yiang Hadròeh wiang da bèn trong ma ùh nèn . Bèn ùh qni ka raðeh ep bòch cleq òòeq waiq khàn ka hatroq , mahaq Yiang Hadròeh yòc kan pi atèh hràng enh bèn òòeq hu waiq khàn am ka bèn .²⁷ Mangai ma sreo ta manoh mangai loq ka manoh Yiang Hadròeh, aih la tiaq manoh Boc Plinh enh haq ma waiq khàn am ka bài kon da Boc Plinh. ²⁸ Bèn loq rìm yiniq Boc Plinh ma broq aih diq òòeq jah lòeq ka bài mangai loq waq ka haq, aih bài mangai haq ma khoe di dèh adroe . ²⁹ Majah qmang aih ,mangai haq ma khoe loq dèh adroe , haq khoe ta qmroq òòeq hu jah tiah ka Kon Haq ,dòq Kon aih jah broq Kon ramua oe taqne oh daq . ³⁰ mangai haq ma khoe ta qmroq dèh adroe ,aih haq khoe creo ,mangai haq khoe creo , aih haq khoe doe dèh mangai taq ataq , mangai haq khoe doe dèh taq ataq aih haq khoe broq dòq jah kan ranhòm .

³¹ Khoe qmang aih bèn doe qmang leq ? Tàng joq Boc Plinh wiang ti bèn, oe i cabò hu tablêq ka bèn? ³² Haq khoe ùh adènh dèh Kon cla , mahaq khoe am dõng ka bèn ,oe i cleq hòh haq ma ùh am hloe ka bèn ajang Kon aih ? ³³ Cabò ma aràng kan tah hadrah ka mangai Boc Plinh ma khoe ràih dèh? Boc Plinh aih Mangai ma doe dèh wì aih jah kan taq ataq . ³⁴ Cabò ma taqmòq yiniq lui ka wì aih ? Ùh i ka cabò .Chuaq Jesus Christ aih Mangai khoe cachit , manoeq khoe rih hlài , haq qnang haqngui enh qma Boc Plinh òòeq waiq khàn ka bèn .³⁵ Cabò jah lah bèn loh khoe kan loq waq da Christ ? kan mangò , kan nanxa, kan canàt rùp ,pangot hrah , hyah hyai , kan yat , chang jaoq ùh xài ?

³⁶ Qmang ka bàu khoe achih : “ tiaq ìh, nhèn glàm kan cachit xèq ka hi ,

Wì ngan nhèn bu dàng triu òòeq xah jam”

³⁷ Mahaq ùh xài , ta rìm yiniq aih bèn canòm ka Mangai ma loq waq ka bèn, òòeq jah blêq yeo hnau ka aih hòh . ³⁸ Au cajap manoh rameh: Yac ka kan cachit ,kan rih, yac ka bình plinh , yac ka kiac dù , yac ka mangai i cwiang, yac ka manòeq ,yac ka yiniq padon trùh ta bla èh , ³⁹ kan haqnhèq kan jrùq, ùh i cleq jah lah bèn loh khoe ka kan loq waq Boc Plinh khoe am ka bèn oe enh dalam ka Chuaq Jesus Christ ,aih Chuaq da bèn.

9 Phaulô loq waq ka mangai Isorali

¹ Enh dalam ka Christ , au ùh qnùt , manoh cliac au hadai wiang panhin ka au xam Yiang Hadròeh , ² Au mangò pi cajaq , manoh au jò leq ma ùh jìq ,³ Au khoe hmaq ngèh dòq au chiuiq diq kan wì git, dòq au kô dahlèh khoe

ka Christ thai ka oh daq ma pajum mahim jan ka au .⁴ aih la mangai Isorali ,aih bài mangai jah broq kon ban da Boc Plinh , jah kan ranhôm , bàu tajao, ranenh , jah kùh waiq xam bàu khoe têu am.⁵ aih bài mangai ha-uang loh enh wì kan cadraq tiaq mahim jan aih raq nang noe ha-uang qnoh Christ , aih Mangai enh qnhèq điq đồng rìm ka yiniq , aih raq Boc Plinh ma khòh manè apôi mòeq òe Amen .

⁶ Aih ùh xài bàu Boc Plinh khoe loh ka qngwan qngwaiq . Majah qmang aih ùh xài mangai leq ha-uang loh enh nang noe Isorali aih điq mangai Isorali .⁷ Èh ùh xài hi loh enh nang noe da Apraham aih điq kon haq , mahaq i bàu achih: “Enh Ysac aih èh ìh men i mòeq nang noe creò tiaq yiniq ìh” .⁸ bàu aih rameh : Kon kaiq enh xech akia aih ùh xài kon Boc Plinh ,mahaq kon da bàu haq khoe têu òeq dèh adroe aih men joq kon da Apraham .⁹ Kò raq bàu ma khoe chôn doè òeq adroe : “Kò èh jah mòeq hanam , Au hi wìh hlài tacô , èh Sara hi i kon calô”¹⁰ Ma xài toq aih hi điq , da Rêbeca hòh jò haq hadràp kon camia, kon da Ysac kan cadraq bèn ,hanoh qmang aih .¹¹ Majah qmang aih , jò wa kon qnhòq ha-uang loh , qnhòq i broq trong lem trong dù – òeq hu jah cajap tiaq manoh Boc Plinh ma khoe đi adroe tiaq manoh cla haq enh (ùh xài tiaq yiniq broq, mahaq tiaq manoh Mangai ma creò)-¹² aih khoe i bàu doe ka miq wa kon qyoh : “Mangai ma daq ep broq hapõng dèh oh” Qmang ka bàu khoe achih “Au ha-och ka Jacôp , mahaq git ka Êsau” .¹⁴ Qmang aih bèn anoe qmang leq ? Ahiaq i kan ùh taq atoq ta Boc Plinh ? ùh i qmang aih!¹⁵ Majah qmang aih ,haq doe ka Môise “ Au ha-och deh ka mangai au loq waq , Au ùh manaq deh ka mangai au ma ha-och” .¹⁶ Trong aih ma xài cabô hi tangèh hi àu hi jah , mahaq oe ajang kan loq waq da Boc Plinh¹⁷ ta Hset Hadroèh hadai i doe ka Pharaôn “ Hagleq au majah khoe dèch paqnàng ìh , òeq ajang aih hujah patô qnoh cwiang itai au , òeq yiniq au jah anoe jàp crõng taneh” .¹⁸ Qmang aih , Haq ha-och deh ka mangai haq enh ha-och, enh broq cadoq manoh bô haq broq .¹⁹ Qmang aih ìh bôch au : Hagleq Boc Plinh oe cwò dèh ka nhèn? Oe i cabô hlài tablêq ka manoh haq enh qmòh? ²⁰ Mahaq ìh qmat cabô, ìh ma hùah rahen ka Boc Plinh ? Abôq taneh wia ka tarahen ka mangai broq loh abôq “ hagleq ìh majah broq loh au qmang kô? ²¹ Mangai thòq môt taneh ma ùh xài haq i cwiang yeo hnau ka taneh , hadai taneh aih qnah haq broq loh abôq lem òeq hu tah hang canaq , qnah haq broq òeq hu tah dahwèq hwòt hwat qmòh? ²² Tàng joq Boc Plinh enh am hnoq deh kan nòeh rai broq òeq hnoq kan cwiang itai haq ,mahaq haq àt deh manoh khoe dùnh am ka bài abôq ma troq toq ka nòeh troq ka raliang cadac ,²³ Haq broq qmang kô am ka bài abôq haq ma loq waq ,haq ma khoe palauq òeq ka wì jah hnoq kan padrõng ranhôm da haq, aih bèn oe jah anoe tam cleq hòh? .²⁴ Aih au anoe trùh bèn ,bài mangai haq khoe creò deh ,ùh xài toq ta mangai Juda, mahaq hloe xam bài mangai diac wì .²⁵ Qmang ka haq anoe ta hset Ôse:

“Mangai ùh xài da au, au creò deh mangai da au .

Mangai au ùh ha-och ,au doe deh mangai au ha-och.”

²⁶ Èh hòh ,tanoè haq ma doe ka wì “ Pì ùh xài mangai da au,

Hadai ta aih raq wì ma hi jah creò kon Boc Plinh halinh mòeq òeq” .

²⁷ Da Êsai jò haq ràu trùh mangai Isorali , haq creò rai hmoe cadèh “ Yac ka mangai Isorali bàc tiaq ka braih diac rasixq , mahaq toq rah ròp da haq majah dèch .²⁸ majah qmang aih Boc Plinh haqnan ka broq òeq xit rìm bàu haq ta crõng taneh .²⁹ Èh hòh Êsai khoe doe :

“ Tàng Boc Plinh điq jaq haqnhèq ,ùh rong òeq ka nang noe bèn mòeq toq hamõng ,

Aih bèn hadai khoe tiaq ka Sôdôm tiaq ka Gômôro điq”

³⁰ Aih èh bèn doe cleq hòm ? Mangai diac wì ùh chaq kan taq atoq ,aih khoe jah kan taq atoq, mahaq kan taq atoq loh enh manoh lùì ,³¹ mangai Isorali chaq ranenh da kan taq atoq , diq khoe capòch ka ranenh aih ,³² Hagleq ? Taiq wì haq ùh chaq xi manoh lùì , mahaq chaq xi yiniq broq . Wì haq khoe catoeh ka hmo ³³ qmang ka bàu khoe achih

“ Kò! Au òòeq ta Siôn mòeq toq hmo , aih hmo kàn broq ka wì catoeh , mangai leq lùì haq , ùh hiaq ep camaih .

10Mangai Juda khoe cadac kan taq atoq da manoh lùì

¹ Wùih diq ka oh daq, kan tangèh ta manoh au hloe xam bàu au waiq khàn ka Boc Plinh , au waiq khàn deh ka oh daq au ,aih la mangai Isorali òòeq diq ka wì jah dèch .² Au wiang capoch panhìn wì haq joq i manoh nhet joq qnàng trong da Boc Plinh mahaq kan nhet aih ùh tiaq manoh rabiaq. ³ Majah qmang aih , wì haq ùh canau kan taq atoq da Boc Plinh wì haq àu chaq ònh deh trong qnoeq òòeq broq ka rađeh jah taq atoq, ùh iu tiaq kan taq atoq da Boc Plinh . ⁴ Majah qmang aih ,Christ aih kan atiq lùch da ranenh , òòeq diq ka mangai lùì hujah kan taq atoq . ⁵ Anoe trùh kan taq atoq loh enh ranenh ,Môise achih qmang kô “Bàì mangai leq ma broq tiaq trong aih , canòm dèh aih raq òòeq hujah rih” .⁶ Mahaq kan taq atoq da manoh lùì , aih achih rameh : “Manoh ih apaq capoch qmang kô : Cabô ma tọc ta Plinh ? Òòeq hu qnoh Christ loh , ⁷ tàng ùh aih : Cabô ma hu loh ta hwin jùq òòeq hu dèch atóc Christ enh kan cahit” ? ⁸ Mahaq doe qmang leq ? Bàu oe ten ka ih , oe ta hacùng ih , oe ta manoh ih . Aih raq bàu da manoh lùì nhèn qnang anoe hnài .⁹ Qmang aih tàng joq hacùng ih anoe qnoh Chuaq Jesus Christ , manoh ih lùì Boc Plinh khoe broq ka haq rih hlài enh kan cachit , aih èh ih jah dèch , ¹⁰ Majah qmang aih, lùì ta manoh aih jah kan taq atoq , mahaq anoe qnoh ajang hacùng bàu aih èh jah dèch .¹¹ Qmang ka Hset Hadròeh anoe “ Mangai leq ma lùì haq , aih ùh hiaq xep. ¹² Majah qmang aih yac ka mangai Juda yac ka mangai Gorec ùh i cleq crài ka dabau . Wì hanoh i pajùm mòeq Chuaq bình halùih xòq ramot ka mangai creo dang haq. ¹³ Majah qmang aih , mangai leq creo dang yiniq Chuaq , aih hi jah dèch .

¹⁴ Mahaq , wì qnhòq lùì haq ,aih wì creo dang qmang leq majah ? Qnhòq lah i cabô anoe trùh haq aih broq qmang leq wì ma lùì ? Èh broq qmang leq wì ma hia tàng joq ùh i cabô lam doe ka wì ? ¹⁵ Mahaq tàng ùh i ka mangai ma khoe jah thê loh lam , aih èh hnài qmang leq ? Tiah ka bàu ma khoe achih “Capiang jènha da bài mangai aràng Bàu lem , aih lem i jaq clceq ,” . ¹⁶ Mahaq ùh xài rìm ngai diq lùì Bàu lem , majah qmang aih Êsai khoe doe “ Waiq Chuaq ! cabô ma lùì bàu nhèn anoe ?” ¹⁷ Qmang aih , manoh lùì trùh , jò wì hi jah tàng , wì jah tamàng jò bàu da Christ jah anoe hnài. ¹⁸ Mahaq au bòch : Ahiaq wì qnhòq tàng ? Majoq qnàng wì khoe tàng :

“ Bàu wì anoe khoe trùh rìm cròng

Bàu wì khoe jàp crống taneh”

¹⁹ Au bòch hòm : “ Tàng qmang aih mangai Isorali ùh lòm qnì cleq qmòh? Môise khoe doe:

“ Au broq ka pì tagrinh ka mangai diac wì .

Au broq ka pì plòh nòeh ka mangai ùh qnì qmoè cleq” ²⁰ Êsai khoe ùh yùq ka anoe

“ Bài mangai ma ùh chaq au , aih khoe hnoq au .

Au mahno rađeh ka mangai ma ùh lah bòch trùh au”.

²¹ Râu trùh mangai Isorali aih haq doe “ Au khoe hnhu ti xêq ka hi tangèa ta nang noe ma cadoq manoh loq capoch gôpla” .

11

Nang noe Isorali

¹ Khoe aih au bòch hòh : Boc Plinh i cadac dèh mangai da haq ? Ûh i , majah qmang aih , au hadai mangai Isorali , kon xau Apraham ,nang noe da Bêjamin . ² Boc Plinh qnhòq hmaq cadac dèh mangai haq ma khoe loq deh adroe. Oh daq ma ùh qni ajang noè Hset Hadròeh ma achih trùh Êli ? jò haq àu bòch waq ka Boc Plinh tabroq ka mangai Isorali , haq doe :³ Waiq Chuaq ! wì khoe jêh đac đổng da ih pajàu, raliang caqniđ đac da ih prang tadreo , oe mòeq ngai au raq, dua wì chaq jêh đac hloe” . ⁴ Mahaq Boc Plinh têu qmang leq ? “Au khoe padon đòeq ka rađeh tapèh mùan mangai gucalô ùh hacùn cràng enh ngèa ka Ba-an. ⁵ Manòeq hadai , i mòeq qnah oe xrong hlài tiaq kan tabàih ma ràiđ dèh. ⁶ Mahaq tàng joq hi tiaq kan tabàih dech aih pi tiaq trong yiniq broq hòh, ùh qmeh kan tabàih ma oe xài kan tabàih hòh? ⁷ Aih qmang leq? Aih iq mangai Isorali chaq ùh jah trong wì haq ma chaq, mahaq mangai majah ràiđ aih khoe jah , mangai ma qnoeq aih loh ka cadoq manoh . ⁸ qmang ka bàu ma khoe achih

“ Boc Plinh khoe broq ka wì loh ka clam cluiq ,

Mat ùh xau hnoq , don ùh xau tàng ,

Trùh hloe manòeq”.

⁹ Đawit hanoh doe:

“ Xoeq diq, yiniang yinàng da wì haq wia jroh wia hláp,

Wia kan catoeh đòeq hu patem chau ka wì haq.

¹⁰ Xoeq diq mat wì haq loh ka clam cluiq ,đòq wì haq ùh xau hnoq.

Crồng wì haq kôc hloe mòeq đòe ”.

.Mangai Isorali tacro , dóq mangai diac qnoeq jah dèch .

¹¹ Au bòch hòh : Mangai Isorali catoeh qmang aih ahiaq đòeq hu cro hloe ùh xài ? Ûh xài qmang aih ! Mahaq taiq yiniq lui wì haq kan dèch majah khoe trùh ka mangai diac wì, đòeq broq ka wì haq tagrinh.¹² Mahaq tàng yiniq lui wì haq khoe broq ka crồng taneh jah kan padrồng , kan capòch da wì haq khoe broq ka mangai diac wì jah padrồng kan , loq ka kan padrồng da wì haq ! ¹³ Au anoe ka pi oh daq mangai diac wì : Enh nêh trùh manòeq ,au broq mangai Tiaq Cla am ka mangai diac wì , au àu broq đòq trong au ma patih jah ranhòm , ¹⁴ đòeq ka manoh cliac oh daq mangai diac cla nhên tajêh , đòq wì loq ran đeh diq , đòeq i đeh moeq qnah ngai ta wì haq jah dèch . ¹⁵ Tàng joq kan hlêh đac da wì haq khoe broq ka phu crồng jah hatroq , aih êh jò wì haq wih hlài ta kan tabàih dech ,aih ma ùh xài rih hlài enh kan cachit qmòh? ¹⁶ Tàng pli gàu mùa hadròeh ,aih diq ka đùng hanoh hadròeh , tàng riah haq hadròeh ,aih diq ka hanenh hanoh hadròeh . ¹⁷ Tàng i mòeq baiq hamenh ma khoe sri đac , aih êh ih qmat long ôliu gàng khoe jah srep qmút ajang bài teu hamenh aih đòeq jah pajùm đeh ka jan, đeh ka riah da long ôliu , ¹⁸ apaq catêh rađeh kô yeo loe ka bài hamenh aih . Tàng joq loq enh catêh, ih ep hêm qmang kô : Ûh xài ih tagah lep ka riah , ma joq qnàng riah ma tagah lep ka ih. ¹⁹ Aih êh ih hi doe : Bài hamenh qnoeq khoe sri đac đòeq ka au jah srep qmút ajang teu bài aih .²⁰ Joq qmang aih , bài hamenh aih khoe

sri cadac taiq wi haq ùh lùì , ih canòm ka manoh lùì majah keo oe , apaq catèh radeh mahaq thê ih loq iu yùq .²¹ Majah qmang aih tàng joq Boc Plinh khoe ùh adènh ka bài hamenh cla long aih , aih èh haq hadai ùh i adènh cleq ka ih .²² Qmang aih ,ngan beq ,ngan kan loq hanò xam kan ùh jah blia da Boc Plinh : Kan ùh jah blia ka wi aih bài mangai khoe tacro , kan loq hanò am ka ih , waq toq ih loq wèq radeh ta kan loq waq da haq , ùh meh ih hadai ep sri cadac .²³ Da wi aih , tàng wi ùh hiaq catàm yôt ta kan ùh lùì , aih èh wi hadai jah srep qmùt majah qmang aih Boc Plinh i cwiang srep qmùt wi haq .²⁴ Mahaq tàng ih khoe jah pot enh long ôliu găng òeq hu srep qmùt talong ôliu lem , aih loq ka bài wi aih hamenh da cla long ma ùh jah srep qmùt ta xem cla qmòh !

Mangai Isorali èh dua jah dèch ...

²⁵ Qmang aih , au ùh enh ka oh daq ùh qnì kan hlèp kô , yùq èh oh daq loq doe òeq kô rabiaq: Aih iq, mòeq qnah raq mangai Isorali ma khoe loh ka cadoq manoh , gòm trùh jò leq mangai diac wi khoe jah qmùt dòq haq tôm òeq.²⁶ khoe aih èh diq ka mangai Isorali hi jah dèch , qmang ka bàu khoe achih :

“Mangai paclaih loh enh Si-ôn.

Dèch òeq kan ngang dù loh khoe ka Jacôp.

²⁷ Aih kan tajao au broq ka wi ,

jò au dèch cadac ka hangai yiniq lui wi haq”.

²⁸ Tàng hatuàng trùh Bàu lem, wi aih khoe loh mangai tagit ka pì , mahaq tàng hatuàng trùh kan ràih enh plinh wi haq aih raq mangai jah kan loq waq taiq ajang boc yaq, ²⁹ majah qmang aih bài biac Boc Plinh ma am xam bàu creò da haq ùh jò leq tablòq .³⁰ Qmang ka enh adroe nèh oh daq khoe ùh iu Boc Plinh ,yàng manòeq kô taiq kan ùh iu da wi aih oh daq ma khoe loh ka jah kan ha-och , ³¹ hanoh qmang aih , manòeq kô wi haq khoe ùh iu , òeq hu hadai jah kan ha-och troeq kan ha-och khoe am da oh daq .³² Majah qmang aih , Boc Plinh khoe clèh diq òeq ta kan ùh qnì iu òeq hu ha-och diq òeq rìm ngai , ³³ Wùih ! joq jrùq qnàng kan padròng , kan rabiaq ,kan loq da Boc Plinh ! Kan hadrah da haq cabô ma hlàt tem , trong da haq cabô ma hlàt qnhro ! ³⁴ Aleq i cabô loq ka manoh da Chuah? ,cabô ma khoe wiang hatinh ti haq ? ³⁵ Cabô khoe am ka haq cleq adroe òeq hu jah haq padreo hlài ? ³⁶ Majah qmang aih rìm yiniq diq loh enh haq , canòm ka haq , tangèa diq ta haq . Kan ranhòm mòeq òeq ùh lùch oe diq òeq ta haq !Amen.

12.....

Dèch radeh ka Boc Plinh .

¹ Qmang aih ,au yòc kan loq waq da Boc Plinh , pariaq diq ka pì oh daq dèch qmòc chac cla pì òeq broq ramènh rih , hadròeh lem ka manoh Boc Plinh ,aih raq kan kùh waiq ma troq da oh daq . ² Apa q top dua qnhòng kô , mahaq wih wia tiaq manoh oh daq ma khoe jah paneo , òeq hujah qnhro loq trong lem manoh xam kan geo gùa da Boc Plinh aih qmang leq cadèh. ³ Qmang aih ,tiaq kan tabàih dech ma khoe am ka au , au anoe ka tang ngai oh daq apaq hèm radeh kô haqnèq hrin , mahaq ep i manoh hèm bu qnang lem tiaq maneh kan lùì Boc Plinh ma khoe am ka tang ngai . ⁴ Majah qmang aih ,tiah ka mòeq toq chac raq mahaq ta aih i bàc yiniq, bài yiniq aih i deh hra trong abroq crài ka dabau . ⁵ hadai qmang aih, enh dalam ka Christ bèn kô bàc ngai mahaq khoe loh mòeq chac ,bài bèn kô aih hamenh da dabau . ⁶ Majah qmang aih bèn i bài kan tabàih crài ka dabau, tiaq kan tabàih dech khoe am ka tang ngai , mangai leq jah am tapoch pajàu , aih asràm tapoch hatiaq dèh manoh lùì , ⁷ cabô jah creò hu broq mangai patih ,aih ep kàt racop radeh ti biac patih, cabô broq mangai hnài , aih ep hnài , ⁸ cabô broq mangai pariaq , aih pariaq , cabô broq mangai ti tabàih am, aih tabòeh am majoq qnàng

haq, cabô broq mangai qnung ngoe , panim haq ðoeq hu qnung ngoe , cabô broq mangai loq ha-och , drah lem búi ka broq .

Kan loq waq ...

⁹ kan loq waq ep ma joq qnàng haq. Ep git ka trong dù bêh trong lem . ¹⁰ Drah yôc kan loq waq laq alàng ðoeq ha-och ka dabau tiah ka oh daq , ngan wí qnoeq ùh hnau ka cla raðeh . ¹¹ Drah panim apaq aroh , ep i manoh loq nhet : ep patih ka Chuaq . ¹² Drah loq búi ta kan tangêh , loq àt ta kan nanxa , cajap manoh ðoeq hu waiq khàn . ¹³ Drah lah axong dahwêq am ka mangai da Boc Plinh jò wí haq i ðeh yiniq nhet ka waq , ðiq ka manoh loq ðih tamoe . ¹⁴ waiq am xôq ramot ka mangai rúp oh daq , waiq am xôq ramot ùh dùh hanip . ¹⁵ wiang lem búi ti mangai lem búi , crò ti mangai crò . ¹⁶ Oh daq ep acaq oe ma hatroq ti dabau , apaq enh toq ka rahù rahòm , mahaq loq haqmuan raðeh . Apaq doe ðeh rabiaq . ¹⁷ Apaq yôc kan dù ðoeq hu patem chau ka cabô , mahaq enh ngèa rím ngai , ep hêm ngan trong leq malem . ¹⁸ Tàng jah , yôc ðiq ðeh ka padren hiwa ðoeq àu hatroq ka rím ngai . ¹⁹ Yôi yôiq oh daq da au , cla pì apaq patem chau ka cabô , mahaq dôq daiq ka kan nôeh da Boc Plinh , majah qmang aih i bàu khoe achih “ Kan patem chau aih oe ta au , i au tabroq chau . ” ²⁰ Qmang aih tàng joq mangai tagit ka pì haq hrah , qmì haq acaq , tàng joq haq croh ranông , drah am haq ôq , broq qmang aih tiah ka pì tah ngia ùnh tagàu wí ” . Apaq dôq trong dù blêq pì , mahaq dôq trong lem blêq trong dù .

13

Loq iu mangai i cwiang

¹ Rím ngai ep iu tiaq mangai wêq cwiang enh qnhêq ka raðeh , majah qmang aih ùh i ka cwiang leq ma ùh trùh enh Boc Plinh , bài cwiang aih ðiq Boc Plinh thê . ² Qmang aih , cabô tablêq hlài ka mangai wêq cwiang , aih haq tablêq hlài ka bàu Boc Plinh khoe thê , mangai tablêq qmang aih haq taqmac yôc ka raðeh kan hadrah . ³ Majah qmang aih , mangai wêq cwiang ùh xài dôq ka mangai broq lem crê mahaq ðoeq ka mangai broq dù crê . Ìh ngêh ka ùh hiaq ep yùq crê ka mangai i cwiang ajoq? Aih drah broq trong lem beq ðoeq hujah wí haq manê baha ìh . ⁴ majah qmang aih wí haq aih hapông Boc Plinh ðoeq i lòeq ka pì . Mahaq tàng ìh broq trong qmêq , aih khòh lêt , majah qmang aih mangai wê chang ùh lah wê waiq ùh i ka yiniq , wí haq aih ranac da Boc Plinh ðoeq hadrah mangai broq dù . ⁵ Aih iq dài majah ep iu , ùh xài crê toq ka loq phôc hi hêq , mahaq hadai taiq ðeh manoh cliac . ⁶ Aih iq raq oh daq majah ep caqnaih thêq , majah qmang aih mangai wêq cwiang aih hapông Boc Plinh ðoeq hu broq trong kô . ⁷ Ep caqnaih da rím ngai dòeh oh daq ma khoe pòq : Caqnaih thêq ka mangai ìh ep thêq , wiang tagop ka mangai khòh wiang gop , crê ka mangai khòh crê , ta iu ka mangai khòh ta iu .

Manoh loq waq aih broq gêh geo ranenh .

⁸ Apaq pòq dòeh bô yac ka yiniq cleq , enh gùng kan loq waq ka dabau , majah qmang aih cabô loq waq ðeh ka mangai ma haten hatia aih haq khoe broq gêh ranenh . ⁹ Hacô bài ranenh aih qmang kô : Ìh apaq tango , apaq jêh ðac mangai , apaq atùng , apaq daiq plai hloe xam bài ranenh qnoeq , yac ka ranenh leq ðiq yùp ta mòeq bàu kô : Ìh ep loq waq ka mangai haten hatia tiah ka cla ìh . ¹⁰ Kan loq waq ùh broq habo ka mangai ten tia . Qmang aih kan loq waq broq gêh geo ranenh . ¹¹ Drah acaq oe qmang aih , majah qmang aih bèn loq manòeq : Khoe ten trùh jò , oh daq ma kúi riu beq , majah qmang aih kan ðêch da bèn trùh khoe ten , ùh hnau ka jò bèn ma baxêm lúi . ¹² Mang khoe jrùq , hì khoe ten trùh , qmang aih bèn drah lêh caðac bài yiniq broq da kan clam cluiq ðoeq hu taqmac wê ranac da kan qngah qngai . ¹³ Drah cadiang lam ma qnhrang qmang ka dahi . Apaq dôq raðeh tacro catàm ta kan ôq bù haqnhròch , taliq talàn xam kan tajênh . ¹⁴ mahaq caxùnh yôc Chuaq Jesus Christ rai apaq hêm ðoeq chaq trong hu patih bài biac xech akia ma rahênh .

14.....

Mangai ma ùh nèn xam mangai ma tadêh ...

¹ Drah lem manoh ðòeq hu ðih wi oh daq manoh lùl ma yeo hamoq ðeh, ùh dùh rahen ðeh trong haq ma qnhòq dai lùl. ² Mangai kô lùl rim yiniq ðiq khòh acaq, mangai manoh lùl ma yeo biao tau acaq ðeh toq cachiq. ³ Mangai acaq apaq jù ðeh ka mangai ùh acaq, mangai ùh acaq apaq ti hadrah ðeh ka mangai ma acaq, majah qmang aih Boc Plinh khoe ðih yòc ðeh haq. ⁴ Ìh qmat iq cabô gleq ma hùh hadrah hapông da mangai qnoeq? Haq yòng qni haq cro qni aih mac da cla craq haq- mahaq haq yòng, majah qmang aih Chuaq i cwiang am ka haq qnhrang. ⁵ Managai kô hèm hi kô ùh hnau ka hi qnoeq, mangai tau hèm yac ka hi leq hanoh daq adàng, mangai leq mangai meh lùl cajap ðeh ta gàu ngoc. ⁶ Mangai ma wèq hi aih, dài Chuaq haq majah wèq, mangai ma acaq aih dài Chuaq haq men acaq, majah qmang aih wi haq manè apôi Boc Plinh, mangai ma ùh acaq aih hanoh dài Chuaq wi haq majah ùh acaq, wi haq hanoh manè apôi Boc Plinh. ⁷ Majah qmang aih taqne bèn kô ùh i mangai leq rih toq ka raðeh, ðh hòm taqne bèn hanoh ùh i mangai leq ma cachit ka raðeh, ⁸ tàng bèn rih aih rih ka Chuaq, tàng bèn cachit aih cachit ka Chuaq. Qmang aih yac ka bèn rih yac ka bèn cachit, aih ðiq ta Chuaq. ⁹ Christ khoe cachit mahaq khoe rih hlài aih ðòeq hu broq Chuaq da mangai cachit xam mangai rih ¹⁰ Mahaq gleq ìh majah hadrah ðeh oh daq? Da ìh hòm, hagleq ìh loq jù ðac ðeh oh daq? Majah qmang aih, bèn kô ðh ðiq ep yòng enh ngèa ka gèq Boc Plinh haqngui hadrah bèn ¹¹ Majah qmang aih i bàu khoe achih rameh:

“ Chuaq doe: Joq qnàng troeq au kô rih halinh, rim toq cràng ðiq ep hacùn enh ngèa au,

rim toq rapet jah manè apôi Boc Plinh”.

¹² Aih èh, ajang ngèa Boc Plinh bèn ðiq ep taqmon hlài rim yiniq bèn ma khoe broq. ¹³ Qmang aih bèn pi dùh ti hadrah ðeh ka dabau, yac ka qmang leq dua bèn ùh roh hmo ti qngèa oh daq, ùh broq ka wi haq tacro. ¹⁴ Au loq rai lùl joq qnàng ta Chuaq Jesus ùh i cleq ma ùh hruah, toq rameh raq cabô hèm dahwèq kô ùh hruah aih haq ùh hruah toq ka mangai aih, ¹⁵ tàng joq mòeq dahwèq acaq ìh broq ka oh daq ep mangò, qmang aih ìh pi oe broq tiaq kan loq waq hòm. ùh dùh ðòeq dahwèq acaq da ìh broq raliang ðac mangai Christ ma khoe cachit am. ¹⁶ Qmang aih apaq ðôq i yiniq cleq ìh loq haq lem mahaq loh nen ðòeq ka wi capoch qmèq. ¹⁷ Majah qmang aih ðiac Boc Plinh aih ùh xài ajang nòe acaq ôq mahaq ajang kan taq atoq, catèm, lem bùi trùh enh Yiang Hadròeh. ¹⁸ Mangai leq tiaq trong aih ðòeq patih ka Christ aih jah lem manoh Boc Plinh, jah wi manè. ¹⁹ Qmang aih, bèn drah chaq trong broq qmang leq hujah hatroq ti dabau ma ðòeq broq dua qngah ka dabau. ²⁰ ùh dùh ðòeq trong acaq raliang ðac biac Boc Plinh ma broq. Rim dahwèq acaq aih ðiq hruah, bèn acaq mahaq broq ka mangai qnoeq catoeh ataq, aih raq kan dù. ²¹ Ma yeo lem, aih ùh acaq jam, ùh ôq alac rai ùh broq qmòe cleq ðôq ka oh daq bèn catoeh cro. ²² Bài trong kô, ìh i ðeh manoh lùl pang leq, ìh wèq ka raðeh pang aih enh ngèa ka Boc Plinh. Xôq ramot ka mangai leq ma ùh taqmac yiniq lui ka raðeh tiaq trong cla haq ma khoe ði ðeh. ²³ Mahaq mangai leq oe raq i manoh qnhòq dai tùt ka dahwèq ðeh ma acaq aih haq khoe taqmòq ka raðeh yiniq lui, majah qmang aih haq ùh acaq tiaq manoh lùl, yac ka broq cleq mahaq ùh tiaq manoh lùl aih raq yiniq lui.

15

Hatroq ti dabau

¹ Qmang aih bèn mangai ma tadêh, ep wiang pòq blòh kan trap ka mangai ma ùh i ðeh ka padren, apaq broq waq ka lem toq ka manoh ðeh cla. ² Rim ngai bèn ep broq lem manoh ka mangai haten hatia bèn, ðòeq i loèq ka wi hu broq dua lem ka wi. ³ Majah qmang aih, yac ka Christ hadai ùh broq lem toq manoh ðeh cla, qmang ka bàu khoe achih “ Bàu bài mangai capoch qmèq khoe ta ùc enh qnhèq ta chac au” ⁴ Majah qmang aih, rim

yiniq enh nêh khoe achih hlài òeq hnài bèn , òq enh kan loq àt xam kan alòng da Hset Hadròeh hnài, bèn jah i kan tangèh . ⁵ Waiq Boc Plinh aih xèm da kan loq àt xam kan alòng am ka oh daq jah mòeq manoh oe ti dabau qmang ka Chuaq Jesus Christ . ⁶ Òeq ka oh daq jah mòeq manoh mòeq bàu ti dabau hu manè apôi Boc Plinh , aih Baq da Chuaq Jesus Christ bèn . ⁷ Qmang aih , oh daq drah òh dabau ,qmang ka Christ khoe òh daq , òq Boc Plinh jah kan ranhòm . ⁸ Majah qmang aih au anoe ka oh daq , Chuaq Jesus Christ khoe broq mangai patih tanòe bài mangai kat akia , òeq hu patô qnoh Boc Plinh ùh gôpla , rai broq ka cajap bàu ma khoe têu am ka kan cadraq bèn . ⁹ qnah hòm òq mangai diac wì jah manè apôi Boc Plinh taiq kan loq waq haq , tiaq ka bàu ma khoe achih

“ Aih raq , au majah manè apôi Boc Plinh taqne mangai diac wì ,

Calêu padèch yiniq haq” .

¹⁰ Èh i achih hòm

“ Diq ka mangai diac wì , lem bùi ti mangai da Chuaq beq.

¹¹ Èh hòm

“ Diq ka mangai diac wì ,

Drah manè apôi Chuaq , rìm ngai khòh manè haq”.

¹² Êsai hanoh doe

“ Enh rangàu riaq da Jêse , jah plòh loh hamenh

Moèq ngai ma hu yòng wèq diq ka mangai diac wì

Mangai diac wì jah tangèh òeh ta haq aih”.

¹³ Waiq Boc Plinh da kan tangèh , broq ka oh daq jah lem bùi rìm trong xam rìm kan catèm ta kan lùì , òeq ka oh daq canòm ka cwiang itai da Yiang Hadròeh jah bình bauq kan canòm. ¹⁴ Diq òng oh daq da au , au lùì oh daq i bình kan loq hanò , bình kan rabiaq , èh loq hnài dabau . ¹⁵ Joq au khoe yòc diq òh ka manoh ùh hòq ka achih jàiq òeq anoe ka oh daq trong kô trong tau , aih òeq broq ka oh daq hmàng , kan tabàih Boc Plinh khoe am ka au . ¹⁶ jah wia mangai patih da Chuaq Jesus Christ am ka mangai diac wì , broq pajàu Bàu lem da Boc Plinh , òeq mangai diac wì jah wia ramènh lem ka manoh Boc Plinh , jah kan hruah enh Yiang Hadròeh . ¹⁷ Aih èh enh da lam ka Jesus au i nen hu catèh radeh ti ajang nòe au ma khoe patih ka Boc Plinh . ¹⁸ Majah qmang aih , au ùh hùà capoch cleq yeo loe ka bài trong Christ ma khoe thê au broq òq mangai diac wì jah iu tiaq haq , enh bàu capoch trùh yiniq broq , ¹⁹ enh noè cwiang itai xam kan halac , tiaq kan itai enh Yiang Hadròeh da Boc Plinh , patep enh Jêrusalem xam bài gùng dudan aih trùh hloe tagùng I-lyri , au aràng Bàu lem da Christ lam jàp jia . ²⁰ Manoh da au toq enh anoe trong Bàu lem tanòe leq yiniq Chuaq Jesus Christ qnhòq lah i cabô ràu trùh , òq au ùh hiaq broq hnim enh qnhèq ka xàn hnim wì qnoeq , ²¹ qmang ka bàu khoe achih :

“ Bài mangai qnhòq lah hia trùh haq , aih jah hnoq haq ,

Bài mangai qnhòq lah tàng anoe trùh haq , aih jah loq ka haq”.

²² Kô iq raq kan khech tât , broq ka au khoe bàc yàng ùh jah trùh hmàih ka oh daq . ²³ Mahaq manòeq kô pi oe i cleq tât padràng au oe ta bài gùng kô , qnah hòm khoe toq leq hanam , au toq ngèh ka jah trùh ti oh daq, ²⁴

qmang aih tàng au jah lam tagùng Ypha-nho , au diq enh troq trong hu hmàih hloe ka oh daq , khoe ka jah oe lem bùi ti oh daq au hadai enh canòm ka oh daq qnung au lam .²⁵ Hnoq anoe qmang aih , manòeq kô au qnang ti trong trùh ta Jêrusalem òòeq hu patih ka bài mangai hadròeh ta aih .²⁶ Majah qmang aih mangai ta Maxêdoan xam mangai tagùng Achai khoe lem bùi ta manoh wiang tagop bac jèn hu tabàih ka ba mangai hadròeh da Chuaq ta Jêrusalem ma qnang hamoq.

²⁷ Wì lem manoh broq qmang aih , majoq qnàng wì pòq dòeh mangai Juda , tàng joq mangai diac wì khoe jah wiang pajùm xòq ramot ti mangai Juda , aih wì haq ep yòc dèh kùng hang qnhòng kô òòeq hu wiang am ka mangai Juda .²⁸ Qmang aih , gòm jò au broq gèh ka biac kô , jò au loq ka joq qnàng wì khoe jah bài dahwèq aih , au hi lam hmàih ka oh daq , èh au hi lam ta Ypha-nho ²⁹ jò au trùh ti oh daq , au aràng bình halùih xòq ramot da Christ ka oh daq .³⁰ Qmang aih , canòm ka Chuaq Jesus Christ da bèn xam kan loq waq loh enh Yiang Hadròeh , au enh oh daq wiang pajùm ti au trong bàu waiq khàn am ka au enh ngèa Boc Plinh .³¹ dòq au jah claih enh ti kông bài mangai ùh lùì tagùng Judê , òòeq bài dahwèq au ma wê aràng kô wì oh daq hadròeh ta Jêrusalem jah dì yòc .³² Aih èh , au hi jah lem bùi òòeq hu trùh ta oh daq , canòm tiaq manoh Boc Plinh enh , èh diq ka bèn hadai jah padài ta dabau .³³ Waiq Boc Plinh kan catèm oe ti oh daq . Amen.

16

Bàu bòch hmàih dèh tangai

¹ Au the mòeq ngai gucadri yiniq haq Phêbê trùh ta pì , aih hanoh oh daq bèn ,haq aih mangai wiang patih ti tagop oe ta Sencorê .² Qmang aih ,enh dalam ka Chuaq pì òòeq haq ma taji qmang ka mangai hadròeh rai am ka haq bài dahwèq haq ma i dèh yiniq nhèt ka waq , majah qmang aih haq hanoh khoe loq wiang am ka bàc ngai qnoeq ta aih hadai i hloe xam au .³ Au bòch hmàih Bêritsin xam Aquila , wa aih mangai hadai wiang patih ka Chuaq Jesus Christ ti au ,⁴ Wa khoe tamùà cla raðeh òòeq hu òòeq kan rih au , ùh xài mòeq ngai au manè wa mahaq xam Tagop Ha dròeh da mangai diac wì.⁵ Hadai bòch hmàih trùh ka Tagop Hadròeh ma tagop ta hnim wa aih . Bòch hmàih ka Êbai-net , aih bua ma diq jaq haten hatia ka au , oe tagùng Asi , haq aih mangai ma baxèm tawih tiaq Christ .⁶ Au bòch hmàih ka Mari , mangai ma khoe xalep ka oh daq .⁷ Au bòch hmàih ka Antrô-nica xam Juni-a , mangai mòeq gùng ti au , mangai hadai oe tu ti au . Taqne bài mangai Tiaq cla , wa aih mangai i tiang i bang , wa aih oe ta Chuaq adroe ka au .⁸ Bòch hmàih ka Amlì-a , bua au oe ta Chuaq .⁹ Bòch hmàih ka Uroban , mangai abroq ti au oe ta Chuaq xam Êtachi , bua lem da au .¹⁰ Bòch hmàih ka Abêlo , mangai khoe lem manoh Christ . Bòch hmàih ka oh daq oe ta hnim Arit-tôbu .¹¹ Bòch hmàih trùh Herôdi-ôn , mangai mòeq gùng ka au . Bòch hmàih ka oh daq oe ta hnim Naxit , aih bài mangai oe ta Chuaq .¹² Bòch mành trùh Triphêno xam Triphôso , aih bài mangai gucadri abroq patih ka Chuaq . Bòch hmai h ka Betsidô , aih bua au mangai khoe broq bàc biac ka Chuaq .¹³ Bòch hmàih ka Ruphu , mangai Chuaq khoe ràih dèh , xam miq haq mangai hadai khoe wia miq au diq .¹⁴ Bòch hmàih ka Asincôrich , Pholêgon , Het me , xam oh daq oe ti wì aih .¹⁵ Bòch hmàih ka Philo-Lojô xam Juli , Nêre xam daq cadri haq , Ôlim xam diq òòeq mangai hadròeh ma oe ti wì haq .¹⁶ Diq ka oh daq yòc kan hip lem hadròeh òòeq hmàih ka dabau . Diq òòeq ka Tagop Hadròeh da Chuaq tanap bàu bòch hmàih trùh oh daq .

¹⁷ Manòeq kô au pariaq diq ka pì oh daq khòh hamang ka bài mangai ma loq ti jròq chiu waq oh daq talah ka dabau , broq dua qmèq , crài ka bàu oh daq ma khoe jah hóc . Drah wia ma hangai ka wì aih .¹⁸ Majah qmang aih wì haq ùh i patih ka Christ , Chuaq da bèn , mahaq patih dèh ka trom hòng , yòc bàu rangot tiah ka diac cadrot òòeq aluàn padô manoh cliac mangai ma ùh qnì dèh cleq .¹⁹ Kan loq iu da oh daq , mangai leq mangai meh khoe loq deh hra , aih iq òòeq au majah manè oh daq , mahaq au toq ngèh ka oh daq rabiaq ka trong lem , ùh

Commented [WU1]:

rabiaq ka trong dù . ²⁰ Boc Plinh kan catêm kô êh rênh jôiq padit Satan enh caqnâm jênh oh daq . Waiq kan loq waq da Chuaq Jesus bèn oe ti oh daq !

²¹ Timôthê , mangai hadai patih ti au bôch hmâih trùh oh daq, Lusi-ut, Jasôn xam Sobatê , aih hadai mangai Juda troeq ka au bôch hmâih trùh oh daq. ²² Au kô Tec-tiu mangai ma achi h jâiq kô , bôch hmâih ka oh daq enh dalam ka Chuaq. ²³ Gai-ut mangai khoe ãih au xam Tagop Hadrôeh , bôch hmâih oh daq. ²⁴ Êrat mangai aih cwan wêq kho bac ta phôq xam Karôtu, oh daq bèn hadai i bâu bôch hmâih trùh ohdaq.

Bâu manè apôi....

²⁵ Manè apôi Boc Plinh ma i cwiang broq ka oh daq cajap manoh qmang ka Bâu Lem au ma anoe xam bâu da Chuaq Jesus Christ ma khoe hnài , tiaq kan mahnu bài kan hlêp ma khoe cadoc enh qnhông calah nêh . ²⁶ manôeq kô khoe jah patô qnoh , tiaq bâu Boc Plinh rih halinh thê , canôm ka bài hset pajâu pèh am ka rìm ngai ãiac wì jah loq ãoêq hu ajênh arâng wì haq trùh ajang kan loq iu da manoh lùì . ²⁷ ajang Chuaq Jesus Christ , waiq kan ranhôm hlài ãiq ta Boc Plinh toq haq raq ma rabiaq , halinh mòeq ãoê ! Amen.